

Siunnersuummut nassuiaatit

Nassuiaatit nalinginnaasut

1. Aallaqqaasiut

Nunami inuussutissarsiutinut tunngatillugu inuussutissarsiormik siuarsaaneq pillugu Inatsisartut inatsisaat nr. 20, 3. december 2012-imeersumi siunertaavoq Kalaallit Nunaanni inuussutissarsiortuni inerisaanerup tamatumunnga tapersiissuteqartarnikkut nukittorsarneqarnissaa. Tapersiisarneq taanna maannamut aningaasaqarnerinnakkut ingerlanneqarpoq. Siunnersuummi Naalakkersuisut aallarnisaasunik ineriartortitsinermik ingerlataqarnernut tapersiisarnissaat ajornarunnaarsinneqassaaq, tassani aallarnisaasut piffissap qaammatit 24-it tikillugit sivisussuseqartup ingerlanerani, aallarnisaanerup immikkoortuanut atatillugu, siunnersorneqarsinnaassallutik isumasioqatigineqarsinnaassallutillu.

Siunnersuummi inatsimmut siunertaaqqaartoq, aalajangersakkanik sinaakutissiisunik aamma aalajangersakkanik aalajangersimasunik ataqatigiissitsiviusoq, inuiaqatigiinni ineriartortuarnut inuussutissarsiormerup siuarsarneqarnissaanut pisariaqartitsinerusinnaasut malillugit naleqqussaasoqarsinnaanissaanik allannguuteqartitsisoqarsinnaanissaanillu periarfissiisooq, inerisaqqinneqarpoq.

2. Siunnersuummi immikkoortut pingaarnertit

Inatsisip ullumikkut oqaasertaligaanerani, suliffeqarfiit aallarnisarnerannut atatillugu aningaasaqarnikkut tapersiinissamut periarfissaqarpoq, taaneqartartut kittaartagaq, kiisalu ilaatigut suliffeqarfimmik pilersitsinissamut allilerinissamullu tunisassianik ineriartortitsineq. Inatsimmi aamma suliassaqarfinnut imaluunniit suliffeqarfinnut immikkuullarissunut aningaasanik ataatsimoortunik immikkoortitsinissaq periarfissaqartinneqarpoq. Tapersiisarnermut aaqqissuussat taakkua inuussutissarsiormerup ineriartortinneqarnissaanut suli aalajangiisuulluinnartumik pingaaruteqarput, aammalu siunnersuummi aaqqissuussanut taakkununga inatsisitigut tunngavissat sunnerneqanngillat. Taamaattoq misilittakkat takutippaat aallarnisaasut aamma aallarnisarnerup immikkoortuani siunnersorneqarnissamik isumasioqateqarnissamillu pisariaqartitsisinnaasartut.

Siunnersuummi Naalakkersuisut aallarnisaasunik ineriartortitsinermik ingerlataqarnermut tapersiinissaat ajornarunnaarsinneqarpoq, tassani aallarnisaasut aallartisarnerup nalaani piffissami qaammatit 24-it tikillugit siunnersorneqarlutik isumasioqateqarlutillu ikiorneqarsinnaallutik. Ingerlatat taakkua ingerlaneranni peqataasut assersuutigalugu

tuniniaanissamik nittarsaassinermik inatsisini aamma naatsorsuuserinermi il.il. atuartinneqarsinnaapput. Tamatuma saniatigut aallarnisaasunik ineriartortitsinermik ingerlataqarnermi peqataasut, aallarnisaasunik allanik assingusumik inissisimasunik, isumasioqateqarnissamut periarfissaqassapput. Siunertaavoq aallarnisaasut aallarterlaatut kukkunermik nalinginnaasunik aqquusaagaqannginnissaaq. Aamma siunertaavoq suliffeqarfiit aallarterlaat iluatsitsisarnerisa pitsanngorsarneqarnissaat aammalu aallarnisaasut akornanni attaveqatigiissitsinissaaq, taamaalilluni imminnut ikioqatigiinnissamut isumasioqatigiinnissamullu periarfissaqassallutik. Aallarnisaasunik ineriartortitsinermik ingerlataqarnerup nalaani suliniummi malunnaatilimmik siuariartortoqarnissaa aalajangiisuulluinnartumik pingaaruteqarpoq.

Aallarnisaasunik ineriartortitsinermik ingerlataqarnermut atatillugu pikkorissaanerup nalaani angalanissamut unnuinissamullu aningaasanik immikkoortitsisoqassaaq. Aallarnisaasut aallarnisaasunik ineriartortitsinermik ingerlataqarnermi peqataasut, piffissami qaammatit 24-it tikillugit sivilissusilimmi agguaqatigiissillugu pikkorissaanerni 4-ini peqataassapput.

2.1 Island-imit aamma Israel-imit misilittakkat

Aallarnisaasunik ineriartortitsinissamut aqqissuussineq nunani assersuutigalugu Israel-imi aamma Island-imi annertuumik iluatsittumik atorneqarpoq. Aallarnisaasunik ineriartortitsinermut aqqissuussinermi tunngaviusumik eqqarsaataasoq tassaavoq taaneqartartoq ”market-failure” iluarsivigineqarnissaata kissaatigineqarnera, tassani ingerlatsinermut isumassarsianut annaasaqaataasinnaasunut kisinnili iluaqutaasorujussuusinnaasunut annaasaqaataasinnaasumik aningaasassaqaarneq annikitsuinnaalluni. Tunngaviusoq tassaavoq nutaaliernerup ungasissumut inuiaqatigiinnut sunniuteqarsinnaanissaata niuerfimmi naleqanngippallaartutut isigineqarnera. Island-imi naalakkersuisut tungaanniit atortorissaarutinik atugassiisoqarsimavoq, tassani aallarnisaasut suliffeqarfimmik inerisaanissamik aammalu isumasioqateqarnissamik periarfissaqartinneqarlutik.

Israel-imi qinnuteqartut pisortanit nalilersorneqartarput, aammalu suliniutit pimoorussinierpaat kisimik, periarfissaqarfiusutut nalilerneqartut, aallarnisaasunik ineriartortitsinissamut ingerlaqqitsinneqartarlutik. Aallarnisaasunik ineriartortitsineq 100 procentimik namminersortunit aningaasalersorneqarpoq, aammalu nalilersuineq ingerlanneqareeraagat pisortat ingerlatami peqataajunnaartarput.

Aallarnisasasunik ineriartortitsinissamut aqqissuussineq ukiuni marlunni ingerlanneqartarpoq, aammalu ingerlaqqinnissaaq isumaqarnerasoq takuniarlugu ukioq affakkaarlugu suliniut misissorneqartarluni.

Aallarnisasasunik ineriartortitsinissamut aaqqissuussinernit taakkunannga misilittakkat takutippaat aallarnisasasunik ineriartortitsinissamut aaqqissuussinerup iluatsitsiviulluarnissaanut makkua naammassineqartariaqartut:

- Suliniutit ataasiakkaat passunneqassapput, paaqqutarineqassapput aammalu pitsaassuseqartumik unammilligassaqaqassallutik – tassa imaappoq suliniut aallarnisaasumik ineriartortitsisumi qanimut inissinneqassaaq, tassani sulisut pikkorissut ulluinnarni suliniummik malinnaasinnaassallutik.
- Suliniutit ataasiakkaat nutaaliortut akornanni naammattunik ”isornartorsiuisussaqaqarfiusumi” ineriartortinneqassapput.
- Suliniutinut aningaasalersuinerup ilusiliineq suliniutip ineriartortinneqarnissaanut aporfiussanngilaq.
- Suliniut niuernerup tunngaveqartumik piujuartinneqarsinnaassaaq.

Suliniut iluatsitsiviulluortoq paasinarsippat, aallarnisaasumik ineriartortitsisup ingerlaavartumik iluanaaruteqarnertut ittumik utertitsissaaq.

Aallarnisaasumik ineriartortitsisoq nutaaliortup aamma aallarnisaasumik ineriartortitsisup akornanni imminnut isumaqatigiissuteqarfiginermikkut ingerlatseqatigiiffimmi peqataajunnaarsillugu akilerneqassaaq, kisianni pingaarnertut maleruagassaassalluni piginnittuuginnarnissaaq.

2.2 Kalaallit Nunaanni aallarnissaasunik ineriartortitsinermik ingerlataqarneq
Israel-imi imaluunniit Island-imi aaqqissuussineq assiliinnarneqarsinnaanngilaq, kisiannili paarlattuanik aaqqissuussineq Kalaallit Nunaannut pissutsinut naleqqussarneqarsinnaavoq aammalu aallarnisaasunik ineriartortitsinermik ingerlataqarnermik pisortanit maleruagassiivigineqartumik pilersitsisoqarsinnaalluni.

Sumiiffissaaq aalajangersimasooq, aallarnissaasunik ineriartortitsinermut illumik taagorneqartoq, Kalaallit Nunaanni innuttaasut siammarsimasuunerat pissutigalugu ajornarpoq. Taamaattumik siunnersuummi pikkorissaanerit aallarnisaasut peqataaffigisinnaasaat, kiisalu aallarnisaasunik allanik isumasioqateqarnissaaq tunngavigineqarput.

Aamma sulisunik pikkorissuseqartunik, ulluinnarni suliniutinik malinnaasussanik, aallarnisaasut neqeroorfiginissaaq ajornarpoq, kisianni tamatumunnga taarsiullugu teknologiip nutaaliaasup internettimi ataatsimoorfissamik, aallarnisaasut ulluinnarni apequtissaannut iluaqutaasinnaasumik, pilersitsinissaaq ajornarunnaarsippaa.

<i>Oqaasertaliinerit atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersumi makkua allangortinneqarput:</p>
	<p>1. § 1 kingorna ilanngunneqassaaq: ”§ 1 a. Aallarnisaasunik ineriartortitsinermik ingerlataqarnerit piffissamut killiligaasut, tassaasut aallarnisaasunut aalajangersimasunut pikkorissaanerit aamma siunnersuineq, aammalu assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissartaqartitsilersussatut nalilerneqartut, tapersiivigineqartarnissaat siunertaralugu, aallarnisaasunik ineriartortitsinermut aaqqissuussanik aningaasalersuinissamut aningaasaliissutinik ataatsimoortunik pilersitsisoqarsinnaavoq.”</p>
	<p>2. § 5 kingorna ilanngunneqassaaq: ”§ 5 a. Tapersiineq aamma aallarnisaasunik ineriartortitsinermut ingerlatanut tunniussivigineqassaaq. <i>Imm. 2.</i> Imm. 1 naapertorlugu aallarnisaasunik ineriartortitsinermut ingerlatat tassaapput pikkorissaalluni aamma siunnersuilluni ingerlataqarnerit piffissamut killiligaasut, aallarnisaasunut aallarnisarnerup immikkoortuaniittunut, aammalu aallarnisaasunut suliffeqarfiutiminni Kalaallit Nunaanni qaammatinit 12-init sivikinnerusumik nalunaarsorsimasimasunut, ikiorsiissutigineqarsinnaasut. <i>Imm. 3.</i> Aallarnisaasunik ineriartortitsinermut ingerlatanut tapersiissutit piffissamut qaammatit 24-it ikillugit sivilissusilimmut tunniunneqarsinnaapput.</p>

	<i>Imm. 4. Naalackersuisut aallarnisaasunik ineriartortitsinermit ingerlatanut aalajangersakkanik erseqqinnerusunik aalajangersaasinnaapput, ilanngullugit tapersiissutinik tunniussinissamut atugassarititaasut.”</i>
§ 10. Neriorsuinermit aqutsineq tapiissutinillu akiliuteqarneq pillugit kommunalbestyrelsimik imaluunniit suliffeqarfimmik allaffissornermik ingerlataqartumik Naalackersuisut isumaqatigiissusiorsinnaapput.	3. § 10, imm. 1, imatut oqaasertalerneqassaaq: ” §§ 5 aamma 5 a malillugit tapersiissutit allaffissornikkut aqunneqarnissaat pillugu kommunalbestyrelsimut imaluunniit ingerlatseqatigiiffimmu allaffissornermik suliaqartumut Naalackersuisut isumaqatigiissuteqarsinnaapput.”
	§ 2 Inatsisartut inatsisaat ulloq xx. xxxx 2016 atuutilerpoq.

3. Pisortanut aningaasaqarnikkut allaffissornikkullu sunniutaasussat

Siunnersuut inatsisaavoq immersugassaq, ukiumoortumik aningaasanut inatsimmi konto 64.10.17-mi sinaakkusiussat iluanni aallarnissaasunik ineriartortitsinermit aaqqissuussanut aningaasaliissutinik ataatsimoortunik pilersitsinissamik periarfissiisoq. Aningaasat aningaasanut inatsimmi immikkoortinneqartut ukiumiit ukiumut nikerarsinnaapput, tassami pisariaqartitsineq malillugu aaqqissuusaq tassani pineqarmat. Aningaasartat ilaatigut aaqqissuussanit atuutereersunit tiguneqarsinnaapput, tassani ukiuni siusinnerusuni misilittakkat takutillugu aningaasartat immikkoortinneqartut pisariaqartitsinermit sanilliullugit annertualaartut.

Taamaattumik siunnersuut pisortanut allanik aningaasaqarnikkut sunniuteqassanngitsoq naliliisoqarpoq.

Aallarnisaasunik ineriartortitsisussaq aqqutigalugu tapersiinissamik neriorsuuteqarneq taamaalaat ukiumoortumik aningaasanut inatsisini aningaasaliissutaasut iluanni tunniussivigineqartassaaq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuummi inuussutissarsiortut pitsaanerusunik atugassaqartinneqarnissaat qulakkeerneqassaaq, tassami maannakkut suliassaqarfinnut aalajangersimasanut imaluunniit suliffeqarfinnut immikkuullarissunut aallarnisarnerup nalaani siunnersorneqarnissaq tapersiivigineqarnissarlu periarfissaqalissammat. Taamaalilluni naliliisoqarpoq siunnersuut inuussutissarsiortunut aningaasaqarnikkut allaffissornikkullu pitsaasunik sunniuteqassasoq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuillu peqqissusaannut sunniuteqassagatinneqanngilaq.

6. Innuttaasunut sunniutaasussat

Siunnersuut innuttaasunut sunniuteqassagatinneqanngilaq.

7. Sunniutaasussat allat annertuut

Siunnersuut allanik annertuunik sunniuteqassagatinneqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami 2015-imi 4. decembarimiit 2016-imi 8. januaarimut tusarniaanermut nittartakkamiippoq.

Aammattaaq siunnersuut tusarniaaffiusunut makkununga nassiunneqarpoq:

Naalackersuisut Siulittaasuata Naalackersuisoqarfia, Aningaasaqarnermut Naalackersuisoqarfik, Ineqarnermut, Sanaartornermut Attaveqarnermullu Naalackersuisoqarfik, Aalisarnermut, Piniarnermut Nunalerinermullu Naalackersuisoqarfik, Peqqissutsimut Naalackersuisoqarfik, Ilaqutariinnermut, Naligiissitaanermut Isumaginninnermullu Naalackersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik, Pingortitamut, Avatangiisinut Inatsisinillu Atuutsitsinermut Naalackersuisoqarfik, KANUKOKA, Sulisitsisut, Kalaallit Nunaanni Politiit, Qeqqata Kommunia, Kommuneqarfik Sermersooq, Qaasuitsup Kommunia, Kommune Kujalleq, SIK, Grenland Business A/S aamma, Visit Greenland A/S.

Tulliuttuni tusarniaanermut akissuteqaatit aammalu allannguutissatut siunnersuutit tusarniaanerup nalaani tiguneqartut sammineqarput. Oqaatigineqassaaq tusarniaanermut akissuteqaatit uingasumik allassimasut, taamaallaat pingaaruteqarnerinik naliliineq tunngavigalugu pingaarnerinnartigut issuarneqarmata.

Tusarniaanermut akissuteqaatit tamarmik tamakkiisunngorlugit Inatsisartuni ataatsimiititaliamut suliarinnittussamut ilanngullugit nassiunneqarput.

Aatsitassanut Ikummatissanullu Naalackersuisoqarfik allappoq ” suliffeqarfinnut aallarlerlaanut tunngatillugu, aallarnisaasut siunnerfilimmik siunnersorneqarsinnaallutik isumasioqateqartinneqarsinnaallutillu, aallarnisaasunik ineriartortitsinermik ingerlataqarneq, Aatsitassanut Ikummatissanullu Naalackersuisoqarfimmut tunngatillugu isumassarsiatut isumatusaartorujussuartut, isikkoqarpoq”

Qaasuitsup Kommuniata tusarniaaneq Inuussutissarsiornermut, Aatsitassanut Takornariartitsisarnermullu Ataatsimiititaliami suliaraa, aammalu oqaatigissallugu ataatsimiititaliap siunnersuut taperserniarlugu aalajangertoq.

Ilaqutariinnermut, Naligiissitaanermut Isumaginninnermullu Naalackersuisoqarfik siunnersuumut oqaaseqaatissaqanngilaq.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik makkuninnga oqaaseqaatissaqarpoq ”*inuussutissarsiutinik siuarsaanermi neqeroorutitut siunnersuummi pineqartunut tunngatillugu suut naatsorsuutigineqarnersut iluaqutaasumik allanneqarsinnaagaluarput, ilanngullugu suliffeqarfiit il.il. aaqqissuussamik atuisussatut ilimagineqartut amerlassusaannut tunngatillugu*”

Inuussutissarsiutinik siuarsaanermut aaqqissuussanit misilittakkat takutippaat 2014-imi aallarnisaasunut kittaartakkat 49-it tunniunneqarsimasut aammalu 2015-imi aallarnisaasunut kittaartakkat 33-it tunniunneqarlutik. Kittaartakkat aallarnisaasunut qaammatit 12-it inorlugit GER-imi nalunaarsorsimasimasunut tunngatinneqarput, taamaalillunilu siunnersuut malillugu aallarnisaasunik ineriartortitsinissamut aaqqissuussamituulli siunnerfigineqartut taakkuullutik. Naalackersuisut naatsorsuutigaat taamatut amerlatigisut aallarnisaasunik ineriartortitsinissamut aaqqissuussamik atuinissamut soqutiginnissasut.

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfiup aamma oqaatigaa ”*aaqqissuussaq qaqugukkut piviusunnagortinneqassanersoq piffissaliussamik ilanngussisoqartariaqaraluarpoq, tassami siunnersuummi piffissamik atuutsitsiviulersussamik allassimasoqanngilaq*”

Oqaaseqaat tusaatissatut tiguneqarpoq aammalu siunnersuut tassunga naleqqussarneqarluni.

Sulisitsisut allapput: ”allanut atatillugu siusinnerusukkut oqaatigineqartut, GE-p nuannaarutigalugu paasivaa, Naalackersuisoqarfik inuussutissarsiornerup ineriartortinneqarnera siuarsarniarlugu suliniutinik aallartitsisoq tunngavissaliisorlu”

Sulisitsisut aamma allapput ” siunnersuutigineqartumut tunngatillugu, inuussutissarsiornermi aallarniisunut aallarlerlaanut aallarnisaasunik ineriartortitsinissamut aaqqissuussaq pillugu isumassarsiaq pitsaasorujussuuvoq aammalu siunnersuummi allassimasutut Island-imi aamma Israel-imi misilerarneqareersimalluni”

Sulisitsisut taamaattoq oqaatigaa *qinnuteqartunut ataasiakkaanut tunngatillugu aallarnisaasunik ineriartortitsinissamut aaqqissuussamut tassunga kikkut allaffissornikkut aqutsisuussanersut pillugu aammalu qinnuteqartoq pikkorissarnernut sorlernut*

neqeroorfigineqassanersoq imaluunniit aningaasartuutit allat suut aallarnissaasunik ineriartortitsinissamut aaqqissuussaq aqutigalugu matussuserneqassanersut kikkut aalajangiisussaansut pillugit paasisutissat GE-p amigaatigigai.

Siunnersuummi § 10-imi allassimavoq ”§§ 5 aamma 5 a malillugit tapersiissutit allaffissornikkut aqunneqarnissaat pillugu kommunalbestyrelsimut imaluunniit ingerlatseqatigiiffimmut allaffissornermik suliaqartumut Naalackersuisut isumaqatigiissuteqarsinnaapput”. Tamanna § 10-imut atuuttumut tapiliussaavoq, tassani allassimalluni ”Neriorsuineramik aqutsineq tapiissutinillu akiliuteqarneq pillugit kommunalbestyrelsimik imaluunniit suliffeqarfimmik allaffissornermik ingerlataqartumik Naalackersuisut isumaqatigiissusiorsinnaapput”.

§ 10, imm. 1 siunnersuutigineqartoq taamaalilluni Naalackersuisut kommunalbestyrelsimut imaluunniit ingerlatseqatigiiffimmut allaffissornikkut suliaqartumut siunnersuummi §§ 5-imut aamma 5a-mut atatillugu pissutsinik tamaginnik aqutsinissaq pillugu isumaqatigiissuteqarsinnaanissaannut periarfissiivoq, tassanilu ilaapput pikkorissaanerit suut neqeroorutigineqassanersoq aammalu aningaasartuutit suut inatsisip iluani matussuserneqartassanersut.

Siunnersuut inatsisaavoq immersugassaq, taamaattumik aallarnissaasunik ineriartortitsinissamut aaqqissuussaq nalunaarutini aalajangersakkani itisilii vigineqarsinnaalluni.

Sulisitsisut makkununga paasisutissat maqaasivaat assartuussinermut aningaasartuutit saniatigut aningaasartuutiviusut allat matussuserneqarsinnaanersut? Kalaallit Nunaanni aningaasartuutiviusut kisimik aaqqissuussamit matussuserneqarsinnaanersut, imaluunniit aamma assersuutigalugu Danmarkimi aningaasartuutit, pikkorissaanerit namminersortuniippata imaluunniit pisortaniippata matussuserneqarsinnaanersut?

Inatsisip atuuffissaanni § 3-imi allassimavoq ”Aallaavittut inuussutissarsiormi ingerlatanut Kalaallit Nunaanni isumagineqartunut taamaallaat tapiissuteqartoqarsinnaavoq. Taamaattorli pikkorissarnernut imaluunniit atortussanik pisiortornernut Kalaallit Nunaanni neqeroorutaasinnaangitsunut tapiissuteqartoqarsinnaalluni.” Aalajangersagaq taanna suli atuuppoq aammalu aalajangersakkanut nutaanut aamma atuulluni.

Siunnersuummi pikkorissaanerit ilai Kalaallit Nunaanni neqeroorutigineqanngippata, Danmarkimi ingerlanneqarsinnaaneri mattunneqanngilaq. Assartuussinermut aningaasartuutit matussuserneqarsinnaanerat siunnersuummi mattunneqanngilaq. siunnersuummi § 5a imm. 4-imi allassimavoq ”Naalackersuisut aallarnissaasunik ineriartortitsinermut ingerlatanut aalajangersakkanik erseqqinnerusunik aalajangersaasinnaapput, ilanngullugit tapersiissutinik tunniussinissamut atugassarititaasut”

aammalu tassunga nassuiaatini allassimavoq, ineriartortitsinermik ingerlataqarnermi ataatsimi pikkorissaarnerit qassiussanersut, aammalu ineriartortitsinermik ingerlataqarnerit qanoq aaqqissuuneqassanersut Naalackersuisut ilaatigut aalajangersakkanik erseqqinnerusunik aalajangersaasinnaasut. Malugiuk allattuiffik taanna tamakkiisuunngimmat.

Sulisitsisut aammattaaq oqaatigaat *siunnersuummut nassuiaatini allassimasoq, aaqqissuussami peqataasut aallarnisaasunik allanik isumasioqateqartarnissaat periarfissiissutigineqartoq*. Sulisitsisut apeqqutigaat, *ullumikkut periarfissaasunut naleqqiullugu isumasioqatigiinnermut taamaattumut periarfissanik allanik siunnersuut qanoq ammaassinersoq?*

Ullumikkut aallarnisaasunik inuussutissarsionermillu ingerlatsisunik allanik isumasioqateqarnissaq soorunami periarfissaavoq, kisianni tamatumunnga ataqatigiissaakkamik periaatsimik ullumikkut soqanngilaq. Imminnut ungasissorujussuunerup aallarnisaasut suliffeqarfutimik sumiiffiata eqqaaniittunik isumasioqatissarsinissaat ajornakusoortissinnaavaa. Ataatsimoorfissamik aallarnisaasut tamarmik allanik attaveqarnissamut aammalu isumassarsionissamut misilittakkanillu immersoqatigiinnissamut periarfissaqarfigisaannik, ullumikkut soqanngilaq. Aaqqissuussanik taamaattunik nunanit allanit misilittakkat takutippaat, isumasioqateqarneq taamaattoq aalajangiisuulluinnartartoq, taamaattumillu siunnersuummi taassuma ilaatinneqarnissaa aamma aallunneqarsimavoq.

Greenland Business A/S allappoq ” *Greenland Business A/S-ip inatsisit taamaattut qujarukkai aammalu aallarnisaasunik tapersiinissamut eqaannerusumik aallaaveqarneq nunatsinnut iluaqutaassasoq isumaqarluni*” aammalu ” *Greenland Business isumaqartoq taamatut inissisimasut amerlanersaannut, ilinniagaqarnissaat sungiusarnissaallu, aningaasaqarnikkut tapiiffigineqarnissamit, naleqqunnerusoq.*”

Greenland Business A/S-ip kaammattuutigaa *naalackersuisoqarfik aallarnisaasunik ineriartortitsinermut aaqqissuussaq sunik imaqartariaqarnerisooq Greenland Business-imut oqaloqateqarnermi peqataaginnassasoq.*

Naalackersuisut Greenland Business allallu soqutiginnittut tamanna pillugu aalajangersakkanik suliaqarnermut atatillugu aallarnisaasunik ineriartortitsinermut aaqqissuussap imarisassai pillugit oqaloqatigissamaarpai.

Greenland Business A/S-ip aamma oqaatigaa § 1 *allanngortinneqartariaqaraluarpoq, taamaalilluni ”pikkorissaanerit siunnersuinerillu” imaalerlugit ”pikkorissaanerit, isumasioqatigiinnerit, workshops, oqalugiarnert, ilinniartitaaneq, najoqqutassat, siunnersuineq il.il.”*

Siunnersuummi atornerqarput ”pikkorissaanerit siunnersuinerillu” pissutigalugu oqaatsit taakkua imartuujummata oqaatsit Greenland Business-ip tusarniaanermut akissuteqaammini siunnersuutigisai, imaralugit.

Greenland Business A/S-ip aamma oqaatigaa § 2 allanngortinneqartariaqaraluarpoq, taamaalilluni ’taksameter’-inut tapiissutinik aallarnisaasunut qinnuteqaataat tunngavigalugu tunniussinissamut aammalu aallarnisaasunik ineriartortitsinermut aaqqissuussamik taakkualu ilaannik neqerooruteqartartunut tapiissutinik tunniussinissamut periarfissaqalissalluni. Taxameterinut aaqqissuussaq, aallarnisaasup nammineerluni aallarnisaasunik ineriartortitsinermut aaqqiissutissamik (immaqa suliffeqarfimmit namminersortumit neqeroorutigineqartoq) toqqasinnaaneranut tunngassuteqassaaq.

Siunnersuummi aallarnisaasunik ineriartortitsinermut aaqqissuussaq aningaasanut inatsimmi aningaasalersorneqartut inatsisitigut tunngavissaqalersinneqarpoq. Inatsimmi § 3-imi allassimavoq ”Aallaavittut inuussutissarsiornermi ingerlaturanut Kalaallit Nunaanni isumagineqartunut taamaallaat tapiissuteqartoqarsinnaavoq. Taamaattorli pikkorissarnernut imaluunniit atorussanik pisiortornernut Kalaallit Nunaanni neqeroorutaasinnaanngitsunut tapiissuteqartoqarsinnaalluni.”

Ullumikkut suliffeqarfimmit namminersortunik Kalaallit Nunaanni aallarnisaasunik ineriartortitsinermik ingerlataqarnissamik neqerooruteqartartunik soqanngilaq, taamaattumillu taksameterimut aaqqissuussamik ulluinnarni piviusunngortitsiniarneq ajornakusoortussaavoq. Qinnuteqartoq pikkorissarnerit pisariaqartut ingerlanniarlugit Danmarkimut imaluunniit nunanut allanut aallartariaqartartussaavoq.

Greenland Business A/S-ip oqaatigaa ”Aallarnisaasunik ineriartortitsinissamik aaqqissuussinermik neqerooruteqarsinnaanissaq [...] Greenland Business-imut kiffartuussinissamut isumaqatigiisummi aamma malittarisassaanni killissaliussat iluanniippoq. Aallarnisaasunik ineriartortitsinermik neqerooruteqarsinnaalernissatsinnut pisinnaasaqarneq aningaasalersuinerlu kisimik apeqqutaapput. Taamaaqataanik kiffartuunneqarnissamut isumaqatigiisummi ingerlatsinermut aningaasassat iluarsineqanngippata Greenland Business aallarnisaasunik ineriartortitsinermik neqerooruteqarsinnaanngilaq.”

KANUKOKA siunnersuummut oqaaseqaatissaqarsimannngilaq.

SIK siunnersuummut oqaaseqaatissaqarsimannngilaq.

Qeqqata Kommunia siunnersuummut oqaaseqaatissaqarsimannngilaq.

Kommuneqarfik Sermersuup ”Naalackersuisut inatsimmik allannguuteqartitsinermi matumani aallarnisaasunut ineriartornissamut atugassarititaasunik pitsanngorsaaniarnerat aammalu aningaasaqarnikkut naalagaaffimmit tapersiinissamut taarsiullugu siunnersuinerimik annertunerusumik tunngaveqartumik sivisunerusumik aallarnisaasunik

ineriartortitsinermik ingerlataqarnissamut, periarfissamik pilersitsiniarnerat, neriulluarnartutut isigaa.”

Kommuneqarfik Sermersuup ”suliniutip aningaasaliissutit siuariartortitsinermut atugassat atuutereersut aqqutigalugit aningaasalersorneqarnissaata pilersaarutaanera, ajuusaarnartuutippaa. Kiisalu Kommuneqarfik Sermersuup ilisimasai malillugit, suliniutit taakkua piffissami qaninnerusumi tamakkiisumik naliliisoqanngitsorlu, suliniutinik pioreersunik taamatut pingaarnersiusoqarmat ajuusaarnartinneqarpoq.”

Ukiut tamaasa inuussutissarsiorneri siuarsaanerni ingerlasuni atuinerup killiffia Greenland Business A/S-ip Naalackersuisunut nalunaarutigisarpaa. Tassangaaniit misilittakkat takutippaat, aningaasat aningaasanut inatsimmi immikkoortinneqartut tamakkiisumik atorneqartanngitsut. Aningaasat inuussutissasiorerup siuarsarnaqarneranut immikkoortinneqartut taakkununga atorneqartassasut, aammalu taakkua sapinngisamik pitsaanerpaamik atorneqartassasut Naalackersuisut kissaatigaat. Misilittakkat takutippaat aallarnisaasut aamma suliffeqarfiit aallarterlaat immikkut siunnersorneqarnissamik pisariaqartitsisinnaasut. Taamaalillutik ilaatigut sinneqartoorutit suliniutinik pioreersunit sinneqartoorutaasutut paasinarsisut, aallarnisaasunik ineriartortitsinerup ingerlanneqarnissaasa aallartinnissaanut atornissaat Naalackersuisut kissaatigaat.

Kommuneqarfik Sermersuup oqaatigaa Kalaallit Nunaanni aningaasaqarnerup maannakkut assigiinngisitaartinneqannginnerata kingunerisaanik aallarnisaasut amerlasuut tassaanngitsut ”first movers” taamaattumillu kalaallit aallarnisaasut allat misilittagaasa atorluarneqarnissaat ajornakusoortoq.

Kommuneqarfik Sermersuup tamanna tunngavigalugu siunnersuutigaa, inatsisissatut siunnersuummi aalajangersakkamik suliffeqarfinnik nunanit allaneersunik ingerlalluareersunik isumasioqateqarnissamut taperserneqarnissamik qinnuteqarnissamik ajornarunnaarsitsisumik, ilanngussisoqassasoq.

Siunnersuut inatsisaavoq immersugassaq, tassani aalajangersarneqarpoq aallarnisaasunik ineriartortitsinermik ingerlataqarnej, aallarnisaasunut suliffeqarfinnullu aallarnisarnerup nalaani pikkorissaanertaqartumik siunnersuinertaqartumillu, piffissami killiligaasumi ingerlataqartarnissaq. Pikkorissaanerit siunnersuinerillu taakkua suliffeqarfinnit nunani allani ingerlallualereersimasuneersinnaanerit siunnersuummi mattunneqanngilaq. Eqqorpoq ullumikkut aallarnisaasut amerlasuut tassaasut ”first movers”, kisianni inatsisissatut siunnersuummi eqqarsaataavoq, aallarnisaasut nutaat aallartinnissaannut ikiuuttussanik suliffeqarfinnik aallarnisaasunillu pisariaqartunik misilittagaqartunik ilisimasaqartunillu, pilersitsinissamut tamanna inuiaqatigiinni kalaallini ineriartortitsinermut iluaqutaassasoq.

Kommuneqarfik Sermersuup aamma oqaatigaa inatsisip nunami sumiiffinni aggulugaasumik aningaasasaqartitsilluni atuutsinneqarnissaa isumaliutersuutigineqassasoq, taamaalillutik kommunit eqeersimaartumik inuussutissarsiornermut politikkimik ingerlatsisut aningaasat

inatsit aqputigalugu atugassanngortinneqartut, ilaannik annikinnerusumik pissarsillutik pillarneqassanatik.

Inuussutissarsiornermik ineriartortitsinermit atatillugu kommunit suliniuteqarnerat Naalakkersuisut nuannaarutigisorujussuaat, kisianni inatsimmi aammalu siunnersuummi siunertaavoq inuussutissarsiornermik ingerlataqartut tapersorsorneqarnissaat aammalu ineriartornermik siuariartornermillu qulakkeerinissaq, kommunit taakkualu suliniutaasa tapersorsornissaat siunertarinqarani. Aaqqissuussat atuuttut naatsorsorneqarnerisa takutippaat Kommuneqarfik Sermersuumi inuussutissarsiornermik ingerlataqartut 2014-imi aamma 2015-imi aaqqissuussanit amerlanerpaanik aningaasaliiffigineqarsimasut.

Kommuneqarfik Sermersuup oqaatigaa *nassuiaatini allassimasoq siunnersuut, aningaasanut inatsimmi konto 64.10.17-imi aningaasaliissutaasut allatut pingaarnersiuffiginerisigut, Greenland Business A/S-imut kiffartuunneqarnissamut isumaqatigiissummut killissaliussat iluanni aningaasalersorneqassasoq.*

”Taamaattoq aaqqissuussamut atatillugu aningaasartuutit annertussusaannut naatsorsuutigineqartut missiliuisoqanngilaq aammalu aningaasartuutit taakkua akilerneqartarnerisa pingaarnersiuinermi allanngortinneqarnerata, assersuutigalugu Greenland Business-ip maannakkut ingerlataannut imaluunniit atorineqartussani allani taaneqartuni (kittaartagaq, tunisassianik ineriartortitsineq il.il.) sunniuteqarnera, tamatumunnga nangissutigalugu [nassuiaasoqarani]”

Oqaaseqaatit tusaatissatut tiguneqarput aammalu siunnersuut taakkua malillugit iluarsineqarpoq.

Eqqorpoq siunnersuut aningaasanut inatsimmi konto 64.10.17-imi killissaliussat iluanni aningaasalersorneqassasoq. Aningaasanut inatsit ukiut tamaasa isumaqatiginninniutigeqqinneqartarpoq, tamannalu aaqqissuussanut eqaatsuutitsivoq.

Kommuneqarfik Sermersuup aamma oqaatigaa *siunnersuummi § 5a, imm. 2-imi Kalaallit Nunaanni Inuussutissarsiortunik nalunaarsuiffik innersuussutigineqartoq – Kommuneqarfik Sermersuup CVR-imut iluaqutaasumik IIN-ip atorunnaarsikkiartuaarneqarnissaa pillugu tusarniaaneq 2014-imeersoq innersuussutigaa.*

Oqaaseqaatit tusaatissatut tiguneqarput, aammalu siunnersuut taanna malillugu naleqqussarneqarluni.

Kommuneqarfik Sermersuup oqaatigaa *inatsit taanna aqputigalugu IIN-imut nalunaarsuiffimmi sapinngisamik kingusinnerpaamik nalunaarsortinnissamut kajumissuseqalersitsinermit pilersitsisoqartoq.*

Siunnersuut aallarnisaasunut aamma suliffeqarfinnut aallarlerlaanut tunngatinneqarpoq. Siunnersuummi allassimavoq, suliffeqarfik ukioq ataaseq sinnerlugu Kalaallit Nunaanni nalunaarsorsimasimangippat aatsaat taparserneqarnissamik qinnuteqartoqarsinnaasoq. Siunnersuummi § 1 a-imi allassimavoq siunnersuut ” aallarnisaasunut aalajangersimasunut aammalu assersuutigalugu amerlanerusunik imaluunniit annertunerusunik inuussutissarsiormi ingerlataqalerluni imaluunniit inuussutissarsiormut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissartaqartitsilersussatut nalilerneqartunut...” tunngatinneqartoq. Tamanna isumaqarpoq qinnuteqaatit ataasiakkaat tamarmik aalajangersagaq taanna tunngavigalugu nalilersorneqartassasut. Suliffeqarfiup nalunaarsorneqarnissaa anguneqarani killiffeqarluni aallarnisaasunut ineriartortitsinermik ingerlataqarnissamik suliffeqarfik akuerineqareersimappat, siunnersuut malillugu aallarnisaasunik ineriartortitsinermik ingerlataqarnissamut sulii allamut tapersiivigineqarnissaq ajornakusuussasoq takorloorneqarsinnaavoq.

Naalakkersuisut Siulitaasuata Naalakkersuisoqarfia siunnersuummut oqaaseqaatissaqarsimangilaq.

Tusarniaanissamut piffissaliussap naareernerata kingorna makkunanga tusarniaanermut akissuteqaat tiguneqarpoq:

Ineqarnermut, Sanaartornermut Attaveqarnermullu Naalakkersuisoqarfik allannguutissatut siunnersuummut oqaaseqaatissaqarsimangilaq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkami aalajangersarneqarpoq Naalakkersuisut aallarnisaasunik ineriartortitsinermik ingerlataqarnissamut aningaasassanik ataatsimoortunik pilersitsisinnaasut, siunertarineqarluni assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissarsititsinissaq anguniarlugu, suliffeqarfiit aallarterlaat aammalu Kalaallit Nunaanni inuussutissarsiortut ataatsimut isigalugit nukittorsarneqarnissaat.

Tassaniippoq aallarnisaasunik ineriartortitsinermik ingerlataqarnerit, inuiaqatigiinnut tamarmiusunut iluaqutaasusussamik inuussutissarsiornermi siuariartortitsinermut, iluaqutaassasut. Aallarnisaasunik ineriartortitsinermik ingerlataqarnerit, aallarnisaasunut aamma suliffeqarfimmut aallarterlaanut killissaliussanik pilersitsinikkut, iluaqutaassapput, tamannalu aqutigalugu aallartisarnerup nalaani taakkununga ikiorsiissallutik aammalu siuariartortitsinermik suliffissaqartitsinermillu ilaalu ilanngullugit pilersitsinissaq ajornarunnaarsissallugit.

Nr. 2-imut

Imm. 1-imut

Aalajangersakkami allassimasoq Naalakkersuisut aallarnisaasunik ineriartortitsinermik ingerlataqarnernut tapersiisinnaasut.

Imm. 2-imut

Naalakkersuisut taamaalillutik aallarnisaasunik ineriartortitsinermik ingerlataqarnernut, tuniniaanissamik nittarsaassinerup, inatsisit naatsorsuuserinerullu il.il. iluanni pikkorissaanernik neqerooruteqarnikkut aallarnisaasunik inerisaanissamik ikiuunnissamillu siunertaqartumut, tapersiisinnaapput pilersitsisinnaallutillu. Pikkorissaanerit aamma Naalakkersuisut tapersiissutinut aaqqissuussaannut allanut qinnuteqarnermut immersugassanik immersuinermut imaluunniit suliassaqarfimmi immikkuullarissumi suliffeqarfimmik aallarnisaanermut atatillugu piumasaqaatinut allanut ikiorneqarnissamut tunngassuteqarsinnaapput, tassanilu ilaapput uumasut nakorsaannit akuersissuteqarnerit, umiatsianut p-imut akuersissuteqarnerit il.il.

Aallarnisaasunik ineriartortitsinermik ingerlataqarnerit nalaanni aallarnisaasup tamanna pisariaqartippagu, aallarnisaasoq siunnersorneqarsinnaassaaq. Siunnersuineq elektroniskimik,

oqarasuaatikkut, internettimi naapittarfinni imaluunniit ornigulluni ataatsimiinnermi pisinnaavoq.

Aallarnisaasunik ineriartortitsinermik ingerlataqarneq aalajangersagaq malillugu aallarnisaasumut aallarnisaanerup nalaaniittumut, ikiorsiissutaasinnaavoq.

Siunnersuut malillugu aallarnisaasoq aallarnisaanerup nalaaniittutut isigineqarpoq aallarnisaasoq suliniummut isumassarsisimappat aammalu ingerlatsinissamut pilersaaruteqarluni, kisianni suliliffeqarfimmik Kalaallit Nunaanni Inuussutissarsiummik Ingerlataqartunik Nalunaarsuiffimmi (IIN) suliliffeqarfimmik nalunaarsuisitsisimanani.

Aammattaq aallarnisaasup suliffeqarfiutaa Kalaallit Nunaanni inuussutissarsiornermi suliffeqarfittut qaammatit 12-it inorlugit nalunaarsorsimasimappat, aallarnisaasoq aallarnisaanerup nalaaniittutut aammalu siunnersuummi pineqartunut ilaasutut isigineqarpoq.

Imm. 3-imut

Aalajangersakkami allassimavoq aallarnisaasunik ineriartortitsinermik ingerlataqarneq piffissamut killiligaasumik ingerlanneqassasoq, aammalu aallarnisaasunik ineriartortitsinermik ingerlataqarnermut tapersiissutit taamaallaat piffissamut qaammatit 24-it angullugit sivilissusilimmuut tunniunneqarsinnaasut. Tamatum kingorna suliniut aallarnisaasunik ineriartortitsinermik ingerlataqarnissami pineqartunut ilaajunnaassaaq. Aallarnisaasunik ineriartortitsinermik ingerlataqarneq assersuutigalugu ukiumi ataatsimi januaarip aallaqqaataaniit ukiup tulliani 31. decembarip 31-anut ingerlanneqarsinnaavoq.

Imm. 4-imut

Naalakkersuisut aallarnisaasunik ineriartortitsinermik ingerlataqarnermut aalajangersakkanik erseqqinnerusunik aalajangersaasinnaapput. Naalakkersuisut taamaalillutik ilaatigut aalajangersaasinnaapput ingerlataqarnerup nalaani pikkorissaanerit qassiussanersut, aammalu ingerlataqarnerit qanoq aqqissuunneqassanersut. Naalakkersuisut aamma tapersiissutinik tunniussinissamut atugassarititaasunik aalajangersaasinnaapput.

Nr. 3-imut

Aalajangersagaq malillugu Naalakkersuisut §§ 5 aamma 5 a malillugit tapersiissuteqartarnernik allaffissornikkut aqutsinissaq pillugu ingerlatseqatigiiffimmik allaffissornermik ingerlataqartumik imaluunniit kommunalbestyrelsinut ataasiakkaanut isumaqatigiissuteqarsinnaapput.

Taassuminnga allaffissornikkut aqutsineq ilaatigut siunnersuut manna aammalu maleruagassat atugassarititaasullu Naalakkersuisut aalajangersagaat tunngavigalugit pisussaassaaq.

Suleriaaseq tassaavoq tapersiissutitut aqqissuussanut tunngatillugu suliassanik sularinninnermik suliaqarneq ingerlatseqatigiiffimmit allaffissornermik suliaqartumit isumagineqartoq. Ingerlatseqatigiiffik allaffissornermik suliaqartoq, qinnuteqaatinut nalunaarusiornernullu tunngatillugu taakkunani ullumikkut toqqaannartumik qinnuteqartunut attaveqartooreerpoq ilitsersuussisartooreerlunilu. Taamaattumik ingerlatseqatigiiffik allaffissornermik suliaqartoq taanna tapersissutitut aqqissuussanik isumaginittuusooq, aamma aallarnisaasunik ineriartortitsineramik ingerlataqarnernik isumaginittunngussappat, pissusissamisuussaaq.

§ 2-imut

Siunnersuutigineqarpoq inatsit ulloq 1. juuni 2016 atuutilissasoq.